

**Meeqqat atuarfiini angajullermi ingerlaviit marlungortinneqarsinnaanerit, tassa aappaa assassorfiiunerusoq aappaalu atuagarsorfiiunerusoq, pillugit apeqquteqaat aallaavigalugu oqallinnissamik siunnersuut**

(Inatsisartuni ilaasortaq Peter Olsen, Inuit Ataqtigiit)

**Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Naalakkersuisut Peter Olsen, Inuit Ataqtigiinneersoq, meeqqat atuarfianni angajullit klassiini ingerlaviit marlungortinnissaannik oqallinnissamut suliniuteqarneranut qujassuteqarfigaat.

Naalakkersuisut isumaqarput meeqqat atuarfiata aqqissuussaanerata unammillernissaanik, assersuutigalugu meeqqat atuarfianni sammivinnik marlunnik atuutsitseqqilernissamik, isumaliuteqartoqartillugu mianersornissaq pisariaqartuusoq, tamanna pillugu ilisimatuussutsikkut tutsuviginartunik tunngavilersuutinillu uppersaateqanngippat.

Suiaassuseq, soqutigisat imaluunniit qanoq qaffasissusilimmik piginnaasaqarneq apeqqutaatinnagu kikkut tamarmik ilinniarnissaminut assigiimmik periarfissaqartinneqarnissaat pillugu Naalakkersuisut siunnersuuteqartoq isumaqatigaat. Meeqqat atuarfiat meeqqat inuusuttullu tamarmik ilinniagariumasaminik inuusutissarsuitigilerumaagassaminillu kissaatigisaannut tunngaviliisussaavoq.

Meeqqat atuarfiat atuartut aalajangersimasut, nukappiaqqat aamma, ilinniagariumasaminik kissaataannut takorluugaannullu akimmiffiusinnaasartunik paasiniaanissaminut taakkunungalu suliniuteqarnissaminut annertuumik suliassaqarpoq.

Atuartut ataasiakkaat pisariaqartitaat, piginnaaneriigaat soqutigisaallu aallaavigalugit atuartitsinerup allanngorartinnissaanut meeqqat atuarfiat pillugu inatsit piumasaqaatitaqareerpoq. Taamatuttaaq atuarfiup pisortaata atuartitsinerup atuartunut tamanut unammillernartoqartillugu pilersaarusiornissaa ingerlanneqarnissaalu qulakkeertussaavaa. Atuarfiit ataasiakkaat namminneerlutik atuartitsinerup qanoq aqqissuunneqarnissaa aalajangersinnaavaat. Assersuutigalugu atuartitsissutit atuagarsornertaqanngitsut salliutinneqarnissaannut tiiminillu amerlanerusunik tiimilerneqarnissaannut inatsit periarfissaqartitsereerpoq, ilikkagaqartoqartartillugu ilikkagassatullu anguniagassat anguneqartartillugit. Inatsit ima aqqissugaavoq atuarfiit atuartitsissutit atuartitsissutillu qanitariissut atuartunut aalajangersimasunut tulluarnerpaasut salliutissinnaallugit. Inatsit aallaavigalugu atuartitsissutinik akimuisumik atuartitsisoqarsinnaavoq, atuartitsinermit ataatsimi ilikkagassatut anguniagassat atuartitsissutinik atuartitsissutinillu qanitariissunit arlaqartuneersut ilanngussorneqarsinnaallutik. Naalakkersuisut misilittagaqarfigaat, atuartitsinerup aqqissugaasinnaaneranut periarfissat tamakkua allallumi periarfissaasinnaasut, meeqqat atuarfiat pillugu inatsisip imareriigai, tamakkerlugit atornerarneq ajortut. Meeqqat atuarfiisa ukiumoortumik nalunaarutaanni tamakkua takuneqarsinnaapput. Taamaattumik

Naalakkersuisut isumaqarput kommunit inatsisip eqaatsumik atornissaanut periarfissaareersut pillugit kaammattorneqartariaqartut inassutigalugulu sammisaq Ilinniartitaaneq Pillugu Ataatsimiittartoqatigiinni Ataavartumi kommunit peqataaffigisartagaanni piaartumik eqqartorneqassasoq.

Naalakkersuisut nukappiaqqat meeqqat atuarfianni naammassigaangamik ingerlaannarlutik ilinniagaqalersannginnerannik ajornartorsiutip piunera akuersaarpaat. Ajornartorsiut sunik tamanik peqquteqarsinnaavoq, pissutsillu assigiinngitsut arlaqartut meeqqat atuarfianni atuartitsinerup meeqqallu atuarfiata aaqqissugaanerannik aallaaveqaannanngitsut tamanna kinguneraat. Immaqa ajornartorsiutip taassuma aaqqinneqarnissaa meeqqat atuarfianniinngilaq, ilinniarfiilli, angajoqqaat inuiaqatigiillu tamarmiusut suleqatigiinnermikkut aaqqiissuteqarfigisinnaavaat. Siunissaq meeqqatta inuusuttortattalu takorluukkaminik piginnaasaqarfimminnillu naligiimmik periarfissaqarlutik piviusunngortitsiffigisinnaasaat suleqatigiissutigisigu.

Naalakkersuisut siunnersuuteqartup ilinniartitaanermi naligiissumik periarfissat siuarsarneqarnissaannik suliniutai pingaartillugillu tapersorsorpaat, unammillernartullu tamakkua suussusersineqarnissaasa suleqatigiissutiginnissaat qilanaaralugu. Naalakkersuisut meeqqat atuarfianni sammivinnik assigiinngitsunik atuutsitsileqqinnerinnakkut atuartut iluaquserneqarnissaat qularaat, aammalumi 7. klassimili pingaaruteqartunik aalajangiinissaminut tatineqarsinnaapput, ilinniarnissamut periarfissanut arlaqartunut sunnuteqarsinnaasunik taakkuninngaluunnit mattunneqarnerannik kinguneqarsinnaasumik.

Naalakkersuisut ilinniartitaanermi periusissiamik suliaqarnerminni ilinniartitaanerup peqataatitsiffiunerup inissaqartitsinerusullu pilersinneqarnissaa takorluugaraat, atuartut ilinniagaqartullu piginnaasaqarfimminnik nukittuffigisaminnillu atuiffigisaat taakkualu tunngavigalugit naaliliiffigineqartarfigisaat, piginnaasat tamakkiisumik piginnaasaqarfinginngisat aallaaviginagit.

Naalakkersuisut oqaaseqaatit taakkua oqaaseqaatigalugit inimi matumani pissanganartumik angusaqarfiusumillu oqalliseqatigiinnissaq qilanaaraat.